



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3

Sen-i anir India nunger asayartem
Indonesia Masters asayatsü

Tanü Nitin Nabin-i National BJP
Tir tenangzükba agitsü



VOL. XXIII ISSUE NO. 97 (ADOK 97) DIMAPUR SANGENNÜ (TUESDAY) AENJETI (JANUARY) 20, 2026

₹ 5.00

Supreme Court-i Nagaland medical officers 97 regularise asüba pusemer

Dimapur, January 19, 2026 (TYO): Nagaland sorkari Covid-19 wara mapang medical officers 97 shimoka regularization asüba Supreme Court-i pusema nungitogo.

January 16, 2026 nü Supreme Court nung special leave petition (SLP) ka angadangdang petitioners-i tanga benoka aliba ken o ajanga sorkar shima alirtem dak kecha masütsü aser medical officers 97 regularise asüba magientsü ta oshidang agüja liasü.

December 11, 2025 nü Gauhati High Court nung Kohima

Bench ajanga obendang aser tetuyuba agütsüba ajanga SLP ya benok ta Health and Family Welfare department-i sangdong ka nung ashi.

Covid-19 wara mapang shimokba medical officers 97 prongla mapa teinyakdak lir aser regularize süogo ta department-i ashi.

August 7, 2024 nü state cabinet-i mulunga agizükba aser December 11, 2025 nü Gauhati High Court nung Kohima Bench ajanga obendang agütsüba sülen regularisation mapa inyaka liasü ta department-isa metetdaksü.

Nitin Nabin-i BJP national president inyaksü

New Delhi, January 19, 2026 (Agencies): Bihar nungi kümsük punguben tashi MLA inyaker Nitin Nabin-i Bharatiya Janata Party (BJP) national president inyaksü.

Hombarnü BJP national president election atema candidate ka dang asübaji Nitin lir aser December 20, 2026 nü pa shimtetsü.

Prime Minister Narendra Modi, BJP president JP Nadda aser state balala nungi chief minister tem dena party lennirtemi nomination papers 37 nung Nabin nem BJP national president inyakdaksütsü pusema agüja liasü.

"Nomination papers ajak shitak dang liasü aser papers agentsü mapang süitemba sülen national president mapa atema Nitin Nabin tenüng dang agüja lir" ta election atema returning officer K Laxman-i tanü nikongdang ashi.

"January 16, 2026 nü schedule of events sangdong agütsü aser electoral roll sayaa liasü. Iba nung lateta aliba ama tanü nikongdang 2:00 nungi 4:00 ako tashi nomination maparen

renemogo. Nitin Nabin nem national president inyakdaksütsü pusema nomination papers sets 37 aru" ta Laxman-isa ashi.

Union minister tem- Rajnath Singh, Amit Shah, Nitin Gadkari, Dharmendra Pradhan, Bhupendra Yadav, Kiren Rijiju, Hardeep Puri aser parliamentary party nung züngsem aikati Nabin indang nomination pusema nungit.

"State 36 nungi State presidents 30 indang election agiba sülen organisational election tenzüka agir. BJP constitution nung state units 50% nung elections agiba sülen national president ka shimba maparen tenzüksü ta lateta lir" ta Laxman-isa metetdaksü.

Nabin national president jenjang nung ajungketba ya lenisüba putu melenshiba lir aser iba ajanga lanu putu nem sabang ka agütsütsü. BJP nung pa ya national president tanubosang asütsü.

"Tanga party temi kibong dang rangloker politics inyaker, saka BJP-ibo booth level nungi national level tashi tashishitsü melii, ajak shilem agia aser timi lenisüba shimer" ta BJP sangdong ka nung ashi.

Centre-i international border akanga ayutsü

Imphal, January 19, 2026 (Agencies): Manipur nung Indo-Myanmar arrtsü anasa border pillar ka raksatsüba India sorkari süoki ia bilemer aser international border akanga ayutsü atema nüngdakba mapatem inyaksü ta BJP MLA Thongam Bishwajit-i ashi.

Border pillars yangluba aser atsüdagba ya teinyakdak maparen ka lir aser iba ya ozüng alema arurtem azüoktsü aser border management akangshitsü atema lir. Tenokdagba agütsüba mesüra raksatsüba tensatem ajurutsü kechiyong ozüng alema inyakertem ajaklen lir saka Centre-i inyakba mapa nung

tetsükdaksü magütsüdagksütsü ta Bishwajit-i ashi.

"Telok kari border infrastructure raksaja tetsükdaksü agütsütsü merangaka India sorkari Manipur nung arrtsü shitak ayutsü atema nüngdakba mapa ajak inyaksü" ta paisha ashi.

Chandel district kübok Indo-Myanmar arrtsü nung Border Pillar 62 anasa border fencing raksatsüba atema bushisüngdang südar ta Manipur Police-i metetdaksüogo.

Myanmar tsütsü nungi mejangjatetba nisung kari iba mapa inyak ama temulung melemi bilemer ta police ketdangsürtemi ashi.

Dimapur nung school aikati tsürabur nem khuret agütsür: DNSU

Dimapur, January 19, 2026 (TYO): Dimapur district nung school aikati textbooks aser uniforms jenjang kanga tur ayoker aser iba ajanga tsüraibur nem khuret talila agütsür ta Dimapur Naga Students' Union (DNSU)-i metetdaksüogo.

Iba tim masüba inyakim ajanga tsüraburtemi parnoki mulungba dokantem nungi alitsü noktanger aser kibongtem, talisa sensaker kibong nem senotsü khuret tulu benloksür ta DNSU-i ashi.

Ibala tim masüba inyakim ajanga shisaliok ya tangutsü temeten ka masü saka takar asoshi maongka ka ama akümtsü

ana nung lir ta parnoki tekümdangsü olen ka shiogo.

Shisaliok rejutem nem school-designated sellers dang nungi dang alitsüla ta ozüng agütsütsü tashi agüja mali anungji tajangzük kanga bushiba inyakim ya anentsüla ta DNSU-i takhangba agütsüogo.

Ano, kümshia textbooks melenshiba ya tim masü kechiyong iba ajanga kaketshirtemi 'second-hand or hand-me-down books' amshitsü noktanger. Iba ajanga kibong aika senotsü kümzüka aruogo ta DNSU-isa metetdaksü.

Item inyakim ya Right of Children to Free and Compulsory

Education (RTE) Act of 2009 anema lir ta parnokisa ashi.

DNSU-isa school tem dang mapang shia uniforms memelentsü mesüra nüngdak maliser patterns tasentem memelentsü metetdaksüogo.

Mapang shia melenshiba ajanga tsüraburtemi kümshia select suppliers nungi jenjang tasak agi uniform alia semdaksütsüsa akümer ta parnoki ashi.

"Item inyakim ya education system sasep nung tangatetba mejungi akümba lir anungji school ketdangpurtemi shisaliok indang nükjidong meyipa reprangshia chichiba angateta inyaksüla" ta DNSU-isa ashi.

ENWA-i India-Myanmar arrtsü atsüdagba anentsü akhanger

Dimapur, January 19, 2026 (TYO): Naga Self-Administered Region nungi Eastern Naga Women's Association (ENWA)-i India sorkar dang Naga nunger tesemtem nung arrtsü atsüdagba mapa ajak anentsü shiogo.

India sorkari Naga nunger putiotsü, sobaliba, lokti

tesentaktep aser kibong yimya alema arrtsü atsüdagba ta ENWA-i tai tongloksüogo.

India sorkari India-Myanmar arrtsülen Naga Self-Administered Region sasep nung Nampong-Pangsau nung arrtsü atsüdagba. Pangsau jila nungi Htahaw No. 1 village tashi

arrtsülen lenmang renemogo aser arrtsü atsüdagba mapa tenzükogo ta ENWA-i ashi.

Naga nunger iba ali nung putusa putu liyonga arur saka India sorkari iba tesem nung arrtsü atsüdagba ya Naga nunger lisopur anema inyakba mapa ka lir ta parnokisa ashi.

Sorkar mapa inyakertem atema data analytics sentong agir



Dimapur, January 19, 2026 (TYO): January 19, 2026 nü NIELIT, Kohima nung state sorkar mapa inyakertem asoshi data analytics sentong tenzükogo.

Chief Secretary-i sorkar ketdangsürtem tajungba kümdaksütsü atema training programmes aika ketdangsüa agiba atema pelar ta Commissioner & Secretary, School Education & SCERT, GoN, Kevileno Angami-i ashi.

Ano, Personnel & Administrative Reforms (P&AR) Department aser Administrative Training Institute (ATI) ajanga iba sentong nung yaritepba atema pelar ta laisa ashi.

"Sorkar ketdangsüba nung data collection ya record-keeping atema dang masü saka lemtet

tajung agitsü atema jungjunga asadanga amshitsüla. Survey aser census ajanga population, infrastructure, health, education aser basic services data bendenba ya shitak amshitsüla" ta Kevileno-isa ashi.

"Sorkar ketdangsübaren akangtsü aser tajungba akümtsü atema data analytics aser digital skills ya kanga tongtipang kümogo. Data nung ajemdaker lemtet agiba ajanga sorkar maparen balala tiptema aser tajungba inyaka otettsü" ta Nagaland & Assam atema NIELIT Director Er. L. Lanuwabang-ia ashi.

Sorkar ketdangsürtemi modern digital tools aser analytical skills meteta alitsüla. NIELIT Nagaland & Assam-i maneni state sorkar

den amalitepa technical support aser expertise teyari agütsütsü ta Er. L. Lanuwabang-isa ashi.

Joint Director, NIELIT Kohima, Er. A. Morimenba Amer-ia data analytics aser digital skills ajanga ketdangsübaren tashi itdaksüba indang lemsatet.

Sorkar ketdangsürtemi technology tasentem adokba shia meteta alitsü atema mapang shia capacity building alitsüla aser NIELIT Kohima-i ibala training programmes nung yariteptsü mulunga lir ta Morimenba-isa ashi.

Nagaland sorkar ketdangsürtem atema ita piyong capacity building programme ya February 13, 2026 nü tembangtsü.

Mokokchung DPDB senden nung Republic Day indang jembi



ADC Mokokchung, Atsunba Walling lenisüba kübok Deputy Commissioner, Mokokchung indang Conference Hall nung January 19, 2026 nü Mokokchung DPDB senden amendang tangokba noksa nung angur.

Dimapur, Aenjeti/January 19 (TYO): Ita shia amenba Mokokchung District Planning & Development Board (DPDB) senden January 19, 2026 nü Deputy Commissioner, Mokokchung indang Conference Hall nung mena liasü. Iba senden nung ADC Mokokchung, Atsunba Walling menden liasü aser Principal, Fazl Ali College, Mokokchung ajanga sarasademter tenzük.

Administrative maparen tanen makai inyaka alitsü mechi

taoba senden nung lemtetba lepa repringhia mera agir aliba osangtem agitepa senden tenzük.

Iba sülen 77 buba Republic Day anogomung atema mapa lema liasü, kong department ajunga nem maparen balala lemsükja liasü.

Jila nung mürekmeju tali kumdaktsütsü mechi district kübok Urban Local Bodies (ULBs) pezü - Mokokchung Municipal Council, Changtongya, Tulia ser

Mangkolemba nung "Cleanest Ward" competition alitsü telemetba agi.

March 2026 nungi iba tetoktepba tenzüksü, kong MMC küboj wards tajungtiba asem aser danga ULBs asem nungi tajungtiba wards ana-na nem senpet sen agütsütsü.

District kübok urban centres ajunga nung mürekmejuba aser libajen wazüka ayuba nung nüburtem shilem agidaktsütsü nükjidong nung iba sentong ya tenzük.

Kohima nung 16 buba National Voters' Day amungtsü

Dimapur, Aenjeti/January 19 (TYO): Chief Electoral Officer, Nagaland ajanga sangdong ka nung 16 buba National Voters' Day ya January 25, 2026 nü Japfu Hotel, Kohima nung nikongdang

1:00 ako nungi tenzükja amungtsü ta metetdaktsü.

Iba dak sendakba nung print aser electronic media houses ajunga dang iba sentong indang osang abentsü asoshi nübu ana-

na bosa yoktsü ayongzükogo. Media shilem agiba ajanga iba benjong sayutsü aser state tesem ajunga nung voter awareness agütsütsü, ta sangdong ajanga ashi.

Dimapur nung project aser scheme balala asadanga senden amen



PM-DeVINE aser NEC schemes kübok Dimapur district nung terenlok maparen balala inyakba ketdangsür temi semdangba mapang tangokba noksa nung angur.

Dimapur, Aenjeti/January 19 (TYO): Prime Minister's Development Initiative for North East (PM-DeVINE) aser North Eastern Council (NEC) indang schemes balala mapa kuma inyakba asadanga senden ka January 17, 2026 nü Hotel Saramati, Dimapur nung mena liasü.

Iba senden nung Angshuman Dey, Joint Secretary, Ministry of Development of North Eastern Region (MDoNER) menden liasü. PM-DeVINE aser NEC schemes kübok sen agütsür aliba amshiba jenjang, submission of demands aser progress reports lepa repringshitsü nükjidong nung iba senden ya mena liasü.

Iba senden nung sendaktepa aliba department ajunga nungi aden aser parnok indang projects tem mapa kuma inyakba osang agüja liasü.

Kasa anogo Dey-i PM-DeVINE scheme kübok 220/132kV (2x100 MVA) aser 132/

33kV (2x50 MVA) Tsitronge-Dimapur substation kisü-jensü semdanga liasü.

Pai ano Christian Institute of Health Sciences and Research (CIHSR), Dimapur nung Radiation Oncology Department indang upgradation mapa semdanga liasü.

Pai January 18, 2026 nü Dimapur district kübok PM-DeVINE aser NEC schemes kübok inyakba projects tem sema jaja. Iba mapang pai Thiluxu yimtsüng semdang aser coffee dak sendakba NEC-funded project repringshima liasü, kong coffee roasting machines aliba, entrepreneurship training ajanga capacity-building dena lir. Iba project nükjidong ya market access tajungba kumdaktsütsü, local enterprises tashi itshitsü aser coffee lu ayimer aser entrepreneurs atema senotsü lenmang tuluba kumdaktsütsü.

Joint Secretary Angshuman Dey-isa Agri Expo Nagaland

nung Nagaland Khadi and Village Industries Board (NKVIB) ajanga yangluba Common Facility Centre (CFC) Emporium for Handloom and Handicraft semdang aser Nagaland Bamboo Development Agency (NBDA) kübok Nagaland Bamboo Resource Centre nung yangluba state-of-the-art Cane and Bamboo Technology facility semdanga liasü.

Pa meina S. D. Meena, Director, MDoNER; Tamsunaro Aier, Development Commissioner, Government of Nagaland; Hekato N, Additional Director, Department of Land Resources; Er. Kasho Chishi, Chief Engineer (Transmission & Generation); Asangla Imti, Secretary, Power Department, Nagaland; aser Kuku Mero, State Mission Director Nagaland Bamboo Development Agency (NBDA), aser Dr. Tolto Metha, team member, NBDA den danga department nungi ketdangsürtem senzüa liasü.

EDTC office nung Capacity Building Workshop ayongzüksü

Dimapur, Aenjeti/January 19 (TYO): World Bank teyari nung

Government of India ajanga tenzükba Raising and Accelerating MSME Performance (RAMP) Programme kübok Capacity Building Workshop ka January 23, 2026 nikongdang 1:00 ako nungi tenzükba East Dimapur Town Council indang office nung alitsü, ta EDTC sangdong ka ajanga

ashi.

Business kiburtem, MSME SHGs, aluyimer aser entrepreneurs kumner dak rangloker sorkar indang schemes, financial literacy, business management aser digital & social media marketing indang sayutsü.

EDTC kübok temsüa alir ajunga iba sentong nung adentsü ajungshir, ta sangdong ajangasa ashi.

Noklak nung Helipad semzükogo



Dimapur, Aenjeti/January 19 (TYO): MLA & Chairman, District Planning & Development Board, Noklak, P. Longon-i January 19, 2026 nü Noklak nung ICONIC PROJECT 2024-25 kübok Rest Room, Approach Road, tetsür

aser tebur metzü meshiba tesem, atsü-atsür aliba den gate, water supply aser electrification aliba Helipad tasen ka semzükja liasü.

Longon meina DC Noklak, SP Noklak, district nung sorkar ketdangsür aser nübur lenirtem oa dena liasü.

Longleng DPDB nung Longleng town 75 jubilee indang jembi

Dimapur, Aenjeti/January 19 (TYO): Longleng District Planning & Development Board (DPDB) senden January 19, 2026 nü DPDB hall, Longleng nung Deputy Commissioner Longleng, W. Manpai Phom, NCS lenisüba kübok mena liasü.

Züngsem tasen metetpelaba mapang agia senden tenzük aser iba sülen taoba senden nung lemteta aliba lepa repringhia liasü.

Longleng jila küm 75 ajungba Platinum Jubilee benjongmung November 2026 nung amungtsü atema Phom People Council

ajanga benokba agenda jembi aser maparen tenzüksü atema committee ka shimtsü mulungtepa liasü.

Taruba DPDB senden nung department inyakyim osang agütsütsü atema Department of Horticulture nem nungloksü.

Iba senden nung 77 buba Republic Day district headquarter nung amungtsüba atema renemshitsü indang jembi department balala nem mapa nungloksü liasü.

Board-i January 24, 2026 nü lokti nübuttsü ayongzüksü telemetba agia liasü.

Longleng nung National Road Safety Month mungogo



Dimapur, Aenjeti/January 19 (TYO): Longleng district nung "Let the new year begin with safety, kindness and responsible living" omen kübok National Road Safety Month nüngtem nung sentong ka January 19, 2026 nü DPDB hall Longleng nung agia liasü.

Iba sentong nung menden Deputy Commissioner, Longleng, W. Manpai Phom, NCS liasü aser pai RTO Mokokchung den teka amteper February ita special camp ka ayongzüksü ta metetdaktsü

aser yangji shilem agitsü asoshi osang prokshitsü ayongzükja liasü.

Paisa road safety indang kaket tilaka sayatsü aser Longleng nung bike anishir nem helmets lema agüja liasü.

Road Safety Enforcement Inspector (RSEI), RTO office Mokokchung, Tamsulong-i anir enforcement team-i lokti dang road safety indang tongmelang agi lemsatapa liasü aser paisa shilem agir ajunga nem road safety indang kaket tilaka lema agüja liasü.



New Delhi, January 19, 2026: Union Minister aser BJP National Tir, J.P. Nadda BJP Tir tasenba election atema party headquarters-i arudang tangokba noksa nung angur.

UAE Tir, Mohamed bin Zayed-i ghonda ana atema India semdang

New Delhi, Aenjeti/January 19 (Agencies): Hombarnü Ato kilonser Narendra Modi-i New Delhi nung aliba airport nung UAE Tir, Sheikh Mohamed bin Zayed Al Nahyan agizük.

UAE leniri ghonda ana atema dang India semdang, ajisüaka ibaji kanga tongtibang senden ka atema liasü, ta osang angazüker.

Tang West Asia nung tensa kanga mejungi aliba mapang ka nung Ato kilonser Modi-i jaokba nung ajemdaker Mohamed bin Zayed-i India semdang.

Ato kilonser Modi-i X ajanga, "Kü adianu, tamarener Sheikh Mohamed bin Zayed Al Nahyan, UAE Tir agizüksü atema airport-i ao. Pai semdangba ajanga India-UAE tesendaktep junga aliba sayur. O lemtsepsü atema yongyaa atar," ta metetdakja liasü.

Ministry of external affairs (MEA)-i ashiba agi, 2024 küm September ita nung Abu Dhabi

Crown Prince Sheikh Khaled bin Mohamed bin Zayed Al Nahyan-i India semdang aser yaküm April ita nung Dubai Crown Prince aser UAE deputy prime minister Sheikh Hamdan bin Mohammed bin Rashid Al Maktoum-i India semdangba liasü.

Hombar nikongdang Modi aser Sheikh Mohamed nati India-UAE Comprehensive Strategic Partnership atema jembiba den külemi regional aser international onüktem nung tebilemba lemsatepa o lemtepogo, ta MEA-i metetdaksü.

Sheikh Mohamed UAE Tir akümba sülen tang agi pai tasembenbuba India semdang.

United States-i Gaza Peace Plan tasenba atema renemba mapang nung UAE Tiri India semdang. Gaza Peace plan nung Gaza administration atema National Committee ka tentetsü

atema-a benoka lir aser Gaza Peace Board nung züngsem asütsü atema US Tir Trump-i Ato kilonser Narendra Modi-a jaoker.

Tawa India aser UAE nati yimtenren, rongsenkettzüng aser defence tsütsü senden aiben mena jembishiniia arudar.

Tan ita tetenzüklen Indian Army Chief General Upendra Dwivedi-i UAE semdangba sepaitem tsüngda amalitepsü atema jembi aser December ita nung External affairs minister S Jaishankar-i Abu semdangba India-UAE joint commission senden atema jembia liasü.

Comprehensive Economic Partnership Agreement (CEPA), Local Currency Settlement system aser Bilateral Investment Treaty kübok UAE aser India na tsüngda yimtenren aser rongsenkettzüng tsütsü tesendaktep kanga junga kümogo.

Tanü Nitin Nabin-i National BJP Tir tenangzükba agitsü

New Delhi, Aenjeti/January 19 (Agencies): Hombarnü National BJP Tir election nung BJP lenir Nitin Nabin den tetokteper melii shimogo; January 20 nü pai Tir tenangzükba agitsü.

Nitin Nabin-i Union Minister aser BJP National Tir, JP Nadda melenzüksü.

Mongolbarnü anüngdang 11:30 ako nung party headquarters nung tenangzükba sentong agitsü aser iba sentong nungji Ato kilonser Narendra Modi, home minister Amit Shah aser defence minister Rajnath Singh nung densema party nung tongti lenirtem aika adentsü.

Party national returning officer, Dr K Laxman-i, BJP State Tirtem 36 nungi 30 shimba sülen national Tir election inyakyim tenzuka liasü, ta metetdaksü.

"January 16, 2026 nü election sentong sangdong aser Electoral Roll metetdakja liasü. Tanü, January 19, 2026 (Hombarnü), nikongdang 2:00 ako nungi 4:00 ako tsüngda Nomination inyakyim tembanga liasü. Nitin Nabin pusema nomination papers set 37 agütsü. Tenüng agientsü mapang süiba sülen BJP National Returning Officer ka ama ni tenüng ka sangdonger, BJP National Tir menden atema Nibin Nabin benoker," ta pai metetdaksü.

BJP puti otsü nung party National Tir inyaka arurtem rongnung tanobusangji Nitin Nabin asütsü (arrshi küm 45).

Party Tir election nung tetokteper melii lenir shimba aser mangatettep kecha makai election tembangba ajanga party telung nung tangatettep aliba sayur.



January 19, 2026 nü Bihar kübok Bodh Gaya nung Buddhist putirtemi 37buba Nyingma Monlam Chenmo (World Peace Prayers) nung shilem agidang tangokba noksa nung angur.

2027 küm AAP-i Gujarat nung BJP sorkar atsüngdoktsü: Arvind Kejriwal

Ahmedabad, January 19 (Agencies): Gujarat nung assembly elections agitsü ano mapang talangka lir, ajisüaka iba state nung election atema jembi tenzükogo.

Hombarnü Ahmedabad yimti nung Aam Aadmi Party (AAP) nung inyakertem tenangzükba agiba sentong nung jembidang AAP tongti lenir, Arvind Kejriwal-i, "Temelenshi atema

Gujarat renema dang lir," ta ashi. BJP-i tesüiba küm 30 tashi Gujarat yimsüsür, aser iba state nung tetsübu aser ochimashi lir; AAP nokdangtsü merangba ajanga party tashi taitba dang akümtsü, ta pai ashi.

"Elections agitsü mapang anasa arur, anungji party anema inyakba kanga bulua akümtsü. Party nung inyakertem aser lenirtem aputsü, ajisüaka ibaji

ajanga party dang tashi itdaksütsüla," ta pai metetdaksü.

Arvind Kejriwal-i, "Iba ya rally ka masü saka booth-level, district-level aser taluka-level in-charges, co-in-charges, party nung inyakertem aser office ketdangpurtem senden lir. BJP-i iba sentong nokdangtsü merangba ajanga parnok tsübuba sayur," ta pai ashi.

(Maneni tapak 8 nung...)



January 19, 2026 nü Bhopal nung police-i Republic Day parade atema renemshidang tangokba noksa nung angur.

Poland-i kiralongra magizüktettsüla: EAM Jaishankar

New Delhi, Aenjeti/January 19 (Agencies): Hombarnü New Delhi nung External affairs minister S Jaishankar-i Poland linük dang India meketa aliba region nung kiralongra infrastructure pu-masemtsü metetdaksü, ta ashi.

Hombarnü Poland Deputy prime minister Radoslaw Sikorski den senden amenba mapang nung Jaishankar-i la dang, "Deputy prime minister, na onok region nung tang tasen masü aser arrtsü adener kiralongraba tebilemtsü aliba nai meteta dang lir. Poland-i kiralongra khenyongi magizüktettsüla aser onok region nung kiralongra infrastructure amenokba pu-masemtsüla," ta ashi.

Jaishankar-isa, "Yaküm September ita nung New York nung aser taküm January ita nung Paris yimti nung ni

Ukraine nung rara dak sendakba nung onok tangatetba lemsatepogo. Iba dak alia alakteta India anema inyakba ya tim masü ta shiogo. Tanü-a ni ibaji ashir," ta metetdaksü.

Ajioda Poland deputy PM Sikorski-ia, arrtsü adena kiralongraba anema inyaktsü nüngdak, ta asüba nungji ni-a ai-aure akar, ta ashi.

Laisa, "India-i Europe den maneni amalitepa inyaktsü imlar. Nenoki Europe tesem ajaklen embassies amenokbaji onoki meteta dang lir. Ibaji ajanga nenoki European Union den tesendaktep junga ayutsü atema inyakba sayur," ta ashi.

Lenir anatisa India aser Poland tsüngda shishilembaba, investments, defence, security, green technologies aser digital tsütsü taliba amalitepa inyaktsü bangjem.



TIR YIMYIM YIMOBILEM (EDITRIAL)

DIMAPUR TUESDAY, JANUARY (AENJETI) 20, 2026

Tekümküm taküm nüngdaker

Nagaland nung mapang talangka Nagaland police nung constable shimtsü asoshi tejangrar ajak nem tokteptsü maongka agüja yimjak nung metetdaksür shimba osang mangashi arur külen, tang meimlaika, Naga nunger lanurtem asoshi Nagaland police mapai aitsü maongka agüja tenüng meshia bendener toktepdaksüba nung asangurtem aikati tamakok anguba ya Nagaland asoshi shisabolutsüka lir. Aji oda, tetsür aser tebur balala asoshi district shia nung Naga kin asoshi pei kin nütsüng yongsük apir shiteta yutsüba mapa asoshi toktepbba nung kin aika nungi teburtemi takok mengutetba agi, nisung dang nungibo mapang teimba kümogo. Item tamakok anguba teburtem rongnung asenok Aor asangurtema dena lir. Aji oda, Mokochung district kisüng nung tebur police 118 shimtsüba nungi tang tashi nung tebur 86-i dang takok nguteta lir, anungji Mokochung district kisüng nung, tapayutsüka, tebur police 32 shimtsü nisung temsüa mengutet anünger. Ibaji police mapai inür asangurtem maliba agi masü saka asen jabasotemi asemtepbba, alemshishiba, pongshishiba aser temang ajungshiba nung police kati atongtsüba jenjang matonger, anungji police asütsü metemsü akümer. Aji oda, Mokochung district nungi nisung meyirijang ana dak tali police mapa asoshi agütsüba rongnungi police akümtsüsa Aor asangur 118 mengutetbaji asen kin asoshi tebilemdangtsü tulu lir. Aji oda, tang tezüluba nung tendangtsü asoshi shimteta aliba tebur 86 dakji alaka tanüngba Aor asangur meyirijang ka shi agi tangar menepa masemtepteter, mepongshiteter aser malemshiteter. Iba ama tia ka nung asen kin koda tongpang nung tsükchir anema nokdaksüla ka adok nunga, koda nokdaktetsü ? Tanü Nagaland nung government mapai aitsü asoshi kishi tezülen nungi masü saka kishi shitaklen nungiang tatidang agütsür aitdaksütsü lemtetba sülen asenoki kishi shitaklen nungi aitsübaji mekokra, asenok asoshibo aji tamakok dang nungi tuluba maksü asütsü. Asenk Aor lanurtem ya tang temang agi tangar memenep dang masü saka asemtepbba nunga aser alemshishiba aser pongshishiba nunga asenoksa tekara aser tajungba asütsüla aser tokolok aser shisatsü nunga asenoksa techiraba, tesadamba aser tadongba asütsü tim. Ajisüaka, tanü lanurtem kaketshisatsü junga mengutetbajibo toktsür, mapa inyak kecha mashi ser tsürabur nem mapa bushidaksürtem akümba ya tebilemtsü tulu lir. Ashiko, smart mobile phone nung game asayaba aser YouTube channel-tem reprangba nungbo asen kin lanurtemi tangar ajak ajateta takok angutsüa akok. Ano, mejangba nung tetoktepbba alinungbo, idakjia asenokibo World cup nguteta takok angutsüa akok. Tanü asenok lanurtemji iba alima ana, mobile amshiba aser mejangba lima nung alirtem lir. Iba jaji tanü lanur aikati alu dang masü saka anü adoka mangu aser pei tsürabur kinungertema, ki ka nung dang alir ser nung menguteper. Aji oda, tanü asenok lanur aika alibaji masü saka lanurtemji temang anema lir mali, temang, tokolok aser shisatsü nung kümküma ali asü mali ta asübajiang ajak atema tagitsü asütsü. Pi tangar America nunger lanurtem reprangang, koda alima balala nung kümkümkümüma tongpang rara nung nokdaka angur. Kasaji British aser Israel nunger lanurtem jetpera nung kenyongi balala, pei lima aser nübortem asoshi taküm aoa mesasa tongpang nung kümkümkümüma nokdaka angutsü. Asenokbo, tanü tia apiibo rarai aotsüsa ka aküm nunga, pei khu bener among adena moutettsüba lanur teimba asütsü. Tanü yabo sali moko techi, yi tejem, drugs techi ta lanurtem dang ashiba putu masü saka nai kechi mapa inyak meteta lir aser na temang shitak kümküma alitsü atema kechi asaya asayar, gym-i aoer asü maoer, ghonda nung mile kwikabo jajater aser taret seret kwikashibo ajunga tuteter ta asüngdanga litepbba putu lir. Iba ama putu ka nung, asenoka tokolok aser shisatsü agidang masü saka tetsüng agia tangar menepa alitsübaji kanga tongtibang aser nüngdak mapa ka kümogo.

OLEMSABANG

"SHI AKADANG ANGO AKA AMAI"

- Watimeren

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

Alemli yimtsüng ka nung Kibong ka nung yamai atalok. oda, iba Lima nung kibong nungji kechisarina tapu jentisa ataloker ser ajangshir. Saka, iba kibong nung atalokba yabo oda nisungeri mamangtsü Ka amai aser tesüngmangtsüka atalokba otsü Ka lir. Par kibong nungji asen teyanglur Tsüngremi chirnur Jabaso ana moaja liasü. Tambusang tenüng -Ji Toshiba aser Tanubusang tenüngji Merenba ta liasü. Aji oda, iba adianu naji tena lanuwa mapang nungi bar Tsüraburi teti Tsüngrem o nungi Sayubentsü agüja kanga dang tenatia tsürabur ashi anga ajemalua intet.

Aji oda, alimar yimsü-yimpong Ka asünungji kodang bar Jabaso Tambusangji Kibong akümtsüsa mapangagitonga aru, Jokala tebo-o-tetsü tenati bar yimtsüng nung tetsür tajungtila ka par Jabaso Toshiba atema Tsüngrem dang sarasadema dang bushitsütsü tenzük. Mapang kobi meli-i dang Tsüngremer teyari ajanga tetsür tajung ka oda la asojen dang masü saka la-or tsürapur jia oda taka tait aser taso-talir Kibong

nungi moatzü. Jokala tenaji bar Tsüraburi aküm ket-keta dang Kibong Kümstsü. Aji oda, küm ishika Sülen tena Kibongji bar yimtsüng Toktsür ang tzüla kati ainshitsüsa mapangi bener arutsü. Iba maji liyonga aodang ano oda Küm Kobi meli-i Jabaso tanubusang Merenba tia jiko bar yimdak school züngtemer ba-a jilai sa aotsüsa tensa mapang agi bener arutsü. Kodang bar Tsüraburi baji ba tedi-er Kidangi school zünga alitsü yok, ba-a pelaseta apuso. Aji oda, yimtsung nungi apu sor asünungji bar tsüraburi eda, aonsotsü tapu kechisarina jenti den jang onü dena khu renemtsür bar jabaso merenbaji tedi-er kidangi tzüla jiki apusoa yok. Ano yangi iba otsü nung asenoki metetsüba ka-ji ba tedi Toshibaji bar India süpai nung alir asünunji alima meta-tesem talang ka nung oa liasü. Ajida asünungji oda küm nung khendang Kidangi sodi aruasa liasü.

Ano khen-khenbo küm ana-asem nungang kidangi sodi aruasa liasü. Iba maji oda, Küm ishika lia arudang oda, liba-liro ajaknung bar tamo jaji ba-dak meket-mesenisa benschia aru. Oda, küm ishika liyonga arudang Merenba Kangadang tepela aser anisüngzük makai dang liasü. Aji oda, iba-maji liyonga arudang ano jokola bar tamo jia Mapangagi bentsünungji la Mashisa aküm, mapang Kobi meli-i asen teyanglur Tsüngremer taoji ajanga bar Kibongnem Jabaso tebor Tajung ka moatsü. Jokola merenbai iba Jabaso tanurji bai bezü aki aküm amaidang Kangadang ba malung ajak agi meima bai dang nu-bonga intetdoksü. Oda, Ibamaji liyonga arudang iba jabasojia jokola nübo-junga inteta aküm. Aji oda, mapangshia tetsü-jagi la-ar Jabaso dangji pei Tebo-Tanubo dak kodsür maket-masentsü mesüra ano Kodsür ba dang -nungi ainshia-pila-a alitsü iba ama mesükba o dang Jabaso dangji shiasa aru. Anungji iba amaji liyonga arudang khen-khenbo bai pei tediji Kangadang menungraseta bilemtetasa liasü. Aji oda, ibama tia ka nung lia arudang ano oagi aliba yimdak bar Tsürabur ana-tua ano alimar wara-tzüra kar agi tonga kangadang mojungi shirangba osang aru. Iba osang angashi-nungji bai bar tamo dang iba khuretji lemsatepa liasü. Saka lai oda zübe-züba ang ka yamai langzüa ashi, ina, joko tantsür-tambor akümer ji nür tsürapur dang masü aji alimar yimya dangar oda anogo ishika tsüngda nung junga doktsar tadang shia liasü. Aji oda, anogo ishika lir külen merenbai tamo dangji ano oda sa yamai shia liasü. Amo, hau nai shiama kübo o kütsü tenaji tantsür-tambor kümogo, saka oda nia juko mapang talangka tena den maju-ruteper asünungji oda ano iba-mai ang shiranga alidang yongi ni asen yimdakjiagi aonungang kangasa tajungba asütsü amai nibo bilemer ta shia tenaji sensaksema liasü. Sakasa, oda shia aruba amaji tamo jaji khenyongi mümulongi liasü. Aji oda, anogo ishika tsüngta bar tetsütu tasüba osang ang angashi. Idangjiang bar tamo tuagi Merenba tu yimdaki yok.

(Maneni asüng nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

NBCC-i Rev. Dr. Robert R. Cunville asüba atema mangyimer



1972 küm Kohima nung Nagaland Crusade agiba mapang Robert Cunville (tiyong) aser Billy Graham (ajichi) na den tangartem tangokba noksa nung angur. Iba Crusade sülen küm ishika lir Billy Graham-i (Billy Graham Evangelistic Association (BGEA) nung associate evangelist ka asütsü atema Cunville jaoka liasü.

Kohima, Aenjeti/January 19 (TYO): Nagaland Baptist Church Council (NBCC)-i Tsüngrem tenzüker aser Naga nunger atema tembar Rev. Dr. Robert R. Cunvillea asüba atema mangyimer; Rev. Dr. Cunville-i Naga nungertem den, talisa NBCC den kanga atongsema inyakogo, ta NBCC General Secretary, Rev. Dr. Mar Pongener-i sangdong ka ajanga metetdaksü.

Billy Graham Evangelistic Association (BGEA) nung Associate Evangelist ka ama pai Nagaland nung alirtem kanga meima khuret abenba den külemi Naga nunger atema mapang shia sarasademtsüba den tenzüka aruogo, ta sangdong nung shia lir.

"1972 küm Kohima nung ayongzükbä Billy Graham Crusade nung pai tongtibang shilem agibaji Naga nungertemi bilemteter, talisa

tientet sensotemi mamatoker. Iba crusade ajanga Nagaland nung Khristan puti otsü nung tanela tsütsü alizüng ka tongteta tamang jenjang asentenshia liasü, telongjem adok aser tamangertem tamang jenjang ain," ta NBCC sangdong nung shia lir.

"Iba crusade nung Rev. Dr. Cunville-i tongti shilem agiba ajanga region nung evangelical kulisüba tashi itshi aser taküm aika tanela jenjang asentenshia liasü. Tawa Kohima nung Kohima Baptist Pastors' Fellowship-i ayongzükbä "Nagaland United: A Gathering of Faith, Hope and Revival" nung pai lemsatepba osang mamatoker. Pai metetdaksüba osangji tejangja liasü aser pastor temi telongjem aser tanela asentenshi atema tebilemstü akaba pai lemsatep," ta NBCC-i metetdaksü.

"Rev. Dr. Cunville ya ajemalu aser Tsüngrem bendanga tenzüker ka ama bilemtettsü. Pai o tanep agi jembi aser pa dak tangar atema aria bilemstüba shisatsü liasü. Pa ya Khrista mesüka ajemalur ka liasü aser Khrista osangtajung sangdongtsü atema jangraba lenir ka liasü. Pa alima nungi pilaba ajanga Khristantem atema evangelical sayutsüngir ka makai kümogo," ta NBCC-i metetdaksü.

"Rev. Dr. Robert R. Cunville taküm, kulisüba aser ministry iba denji külemi pai Naga nunger atema mapa tajung inyakba asoshi NBCC-i Tsüngrem dang pelar. Tang ama mangyimba mapang nung Tsüngremi mangyimer kibong züngsemtem nem tesünep aser tashi agüjang ta sarasademtsür," ta kasa sangdong ajanga lemsatep.

Yaküm India nung Muslim/Khristantem anema tesempa o kanga jembi

January 19, 2026: 2025 küm India nung tesempa o jembiba shilem 13 agi teimba aküm, aser temsepa o jembiba ya talisa Muslim nungertem aser Khristantem anema liasü, ta US nung aliba think tank kati metetdaksü.

Taoba hopta India Hate Lab (IHL)-i report ka ajanga, yaküm India tesem balala nung tesempa o jembiba tatalokba 1,318 liasü, ta metetdaksü aser ibaji 2024 küm (tatalokba 1,165) aser 2023 küm (tatalokba 668) den medemdangra shilem aikati teimba akümba lir, ta metetdaksü.

Tesempa o jembibaji talisa yimtenren sentongtem, yimsü dak sendakba sentongtem aser sobaliba sentongtem nung jembi. Yimsü nung ajemdaker tesempa o jembitsü atema item sentongji sabang ka mesüka

kümogo, ta kasa report nung shia lir.

2025 küm India tesem balala nung anogo shia amai tesempa o jembiba tatalokba pezü liasü; aser itemji state 21 aser union territory ka nung liasü.

Yaküm tesempa o jembibaji shilem 98 bo Muslim nungertem anema liasü; iba sülen tanabuba jenjang nung Khristantem anema jembiba liasü.

Uttar Pradesh nung item ama tatalokba 266 liasü, Maharashtra nung 193, Madhya Pradesh nung 172, Uttarakhand nung 155 aser Delhi nung tatalokba 76 liasü.

IHL-iisa, tesempa o jembiba tatalokba 1,278 bo video tangoka social media nung kanga prokshiogo, ta metetdaksü.

Gujarat nung Khristan putir, Cedric Prakash-i, "Tesempa o

jembibatemi talisa Muslim nungertem aser Khristantem anema liasü," ta ashi.

Jesuit putirisa, tesempa o jembiba ajanga telemsa adokdaksüba dang masü saka rara-a adokdaksür, ta ashi.

January 16 nü osangbener den jembidang pai, "Ibayongji iba linük nung nüt süng ajema alirtembo kasa sensotem ama mezüngshir aser tetsübu nung alir," ta metetdaksü.

Sorkari tesempa o jembiba anema ozüng tesashi benok nung ang tesempa o jembiba nokdangtsü aser judiciary-ia aibelenertem nem temerenshi agütsütsüla, ta pai ashi.

United Christian Forum (UCF) convenor, A C Michael-i, sorkar menden nung alirtema aikati tesempa o jembir, ajisüaka tia maka judiciary-ia iba tebilemstü onük anema kecha meinyakteter, ta ashi.

ANOGO ABEN TSÜNGREM DEN

Tematiba Mapa (T. Ken 100:1-5)

Nai Tsüngrem tenüng asangba ken atandang Laishiba nung Tenüngsang Ken 100 kaji atener ta bilemtetang. Iba ken nung Kibuba koda külemstü tetuyuba agütsür.

Shibai Kibuba külemstü ? "Nenok alima ajak, Kibuba dang tepela ola yokang" (t.1). Tsüngremi alima ajungai Pa külemdaktsüner aser tenüng sangdaktsüner. Kechiba asenoki alima ajaki oa osangtajungji sayutsüla ? Kenü alimai Kibuba dangi tepela ola yoktsü atema.

Asenoki Kibubaji koda külemstü ? Mezüngbuba, tenzükbä ajanga. "Tepela agi Kibuba tenzükan: Pa tsüngdangi ken tena arung" (t.2). Asenoki tepela agi Kibuba tenzüksüla kechiaser asenok mulungjang nung tepela lir aser Kibuba tepelai asenok nem tashi agütsür.

Tanabuba, asenok ken agi Kibuba tenzüksü akok. "Kibuba tsüngdangi ken tena arung." Asenoki kenji tentet mapa ka ama dangbo matentsü. Ken kaket amer ken atener saka asenok mulungjangbo talang nung pilar alir. Ken nung ashiba tetezüji shisadanga atentsüla.

Asenoki Pa nem bendanga agütsüba ajanga Pa külemer. "Kibuba, Paji Tsüngrem ta nenoki metetang: Pai asenok yanglu, aser asenok Pa chiyimdak chiyimba santem" (t.3). Pa nem agüjang. Pa anidakang. Pa dang tashi angang.

Tatemsä asenoki tenla agütsüba ajanga Kibuba külemer. "Tenüngsang agi Pa süngkümi iang, aser Pa talidaki sanga iang; Pa dang tenüngsang agüjang, aser Pa nung moajang" (t.4). Nai tenla sabang nung shiruru agütsütsü menügdak, saka nai ne mapang, sen aser temetetba agütsütsü akok.

Kechiba asenoki Kibuba külemstüla ? "Kechiaser Kibuba tajung lir; Pa temeim taochi aser putu ajak dang Pa temulung lemtetba, tatem maka" (t.5).

Khristan taküm nung tematiba mapaji Kibuba külembaji lir. Ne taküm kodanga tematazütsü ka tesüdaktsü. Tepela aser tenüng asangba mulungjang agi ken tena, bendanga agüja aser tenla agüja Pa külemang.

Nagpur yimti nung Khristan school ka raksatsü

Nagpur, January 19, 2026

(Agencies): Maharashtra state kübok Nagpur yimti nisung kari Khristan school ka kakkoka tur Principal office nungi sen aika auya aser prayer hall raksatsüba sülen temeshi oset ka auyar ao.

January 18, 2026 nü osangbener den jembidang Nagpur nung Archbishop, Elias Gonsalves-i, "January 14 aonung Nagpur kübok Butibori nung aliba St. Claret School nung ibaji atalok," ta metetdaksü.

Iba school ya Claretian Missionary temi lapokba lir. Auertem jagi Principal office nungi sen 30,000 auya, iba sülen anasa aliba prayer hall nungi hon agi yangluba temeshi oset ka auya.

Archbishop-i, iba ya auyatsü tebilemba nung asü Khristantem anema inyakbar tang tashi nungbo mejangja, ta metetdaksü.

Police-i iba tatalokba bushisüngdangdar, ta paisa

metetdaksü.

All India Catholic Union nung otongdar, John Dayal-ibo, prayer hall raksatsüba ya Khristantem melung yirutsütsü nükjidong nung inyakba lir; iba ya auyatsü nükjidong nung inyakba dangbo masü, ta metetdaksü.

Dayal-isa, "Iba school ya RSS indang headquarters aliba Nagpur yimti nung lir. RSS-i Khristantem aser Muslim nungertem anemer. Police-i Khristantem aser Khristan rejutem kümzüksü atema inyaksüla," ta ashi.

Maharashtra yimtiba, Mumbai nung amenoka aliba Association of Concerned Christians secretary, Melwyn Fernandes-i, "Iba tatalokba ya ajanga Khristantem melung kanga yirutsüogo. Yimjung meimba Khristantem anema inyakbaji magizüktettsü, ta osang ka sangoktsütsü atema ketdangsertemi aibelenertemji pua temerenshi agütsütsüla," ta takhangba agütsü.

AO OSHI ANGAZÜKDAK:**TANÜ ANGAZÜKTSÜBA OJANG****Tugu**

(v) toktsür tekaleni atu (move up, went up)

* Alu nung kübui ni toktsür tugu.

Tuguma

(v) tesem toktsür ajak tekaleni atu (all went up)

* Anü aidangbo alu nunger ajak tuguma.

OLONG PAITEP # 7389

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonungchiyongtsüasenba

-(7)

5. Mangyimba mapang

-(5)

7. O tamendakdak

-(4)

8. Peidakmalangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüing

-(6)

3. Tenarong maten

-(6)

4. A ___ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S ___ k

-(3)

14. T ___ r

-(3)

OLONG PAITEP # 7388 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

Engineers India Limited (EIL)-i maneni global engineering history nung tenüing tajung ka ngutetogo aser iba ya Assam nung Brahmaputra River punglang nung 26 diameter pipeline tulu 4,058-meter Horizontal Directional Drilling (HDD) pullback inyaktetba lir. Iba ya "longest HDD crossing ever completed for a pipeline" alima otsü tasen ka lir.

Numaligarh Refinery Limited (NRL) ajanga 1,635-kilometer Paradip-Numaligarh Crude Oil Pipeline (PNCPL) project nung iba ya shilem ka lir.

Third Eye Asian Film Festival nung Assamese film wangshiogo**Guwahati, January 19, 2026**

(Agencies): 22nd Third Eye Asian Film Festival nung Assamese cinema ajanga tongti shilem agiogo aser filmmaker Monjul Boruah-i yangluba film-Romantic Affairs ajanga sempet aika nguogo.

Iba film ajanga Indian Competition section nung tongtipang sempet asem-Boruah (Best Director), Kasavi Sonkorison (Best Actress), aser actor Boloram Das (Special Jury Award) angu.

"Iba ya teloki anguba takok ka lir. Iba film yangluba nung shilem agir ajak dang kangasa

pelar" ta Boruah-i metetdaksü.

Maneni, Assamese cinema nungi Sanjib Sabhapandit'er Ballad to the Winds ajanga Indian Cinema category nung Best Film angu.

Iba benjung nungsa Northeast ajungalen nungi cinema ajungketogo. Tribeni Rai'er Shape of Momo-ia Best Directorial Debut Award ngua liasü aser actress Gaumaya Gurung-i Special Jury Award angu.

Tanga takok angurtemji-Pinger - The Cage atema Rudrajit Roy aser The Weight of Longing atema debut

director Onkar Bhatkar na lir.

Marathi cinema category nung Sabar Bond-i Best Film aser Rohan Kanawade-i Best Director award ngua liasü. Tena dak alia Marathi filmmaker Santosh Davkhar nem-a Gondal atema sempet agütsü.

Third Eye Asian Film Festival ya Department of Culture, Government of Maharashtra, Maharashtra Film, Theatre and Cultural Development Corporation, aser National Film Development Corporation (NFDC) den yaritepa ayongzüker.

Onoki ozüing alema arurtem bushitsü: Himanta Sarma**Guwahati, January 19, 2026**

(Agencies): Assam nung bendanger 14 tashi apu aser meyipa yokogo ta Chief Minister Himanta Biswa Sarma-i Deobarnü ashi.

"Sorkari border security

as internal vigilance

akangakanga inyaker. Iba mapa ya tanep züingia inyaker aser ozüing alema arurtem apu" ta Chief Minister Sarma-ashi.

"Nenok atsüka alitsü akok saka onoki nenok bushitsü

as India nungi meindoktsü" ta pai metetdaksü.

Assam state sorkari ozüing alema arurtem anema 'zero-tolerance' mapa inyaker aser Assam nung security atema ibala mapa maneni inyaksü ta Sarma-isa ashi.

Karbi Anglong nung police-i Rs 70 lakh jenjang opium apu**Guwahati, January 19, 2026**

(Agencies): Assam police-i January 18, 2026 nü Karbi Anglong district nung drugs aika puogo.

Assam Police-i Karbi Anglong nung Rs 70 lakh shi alang opium seret 10 apu ta

osang ajanga ashi.

Iba drugs shibelener puogo aser maneni bushisüngdang südar ta ketdangsürtemi ashi.

"Drugs shibelenertemi tangari memeteti belents ta bilem saka Karbi Anglong Police-i apu. State sorkari drugs

anema zero-tolerance mapa inyaker aser Assam nung gari lenmangtem ya narcotics belentsü atema masü saka terenlok aser tejakleni aotsü atema lir" ta Assam Chief Minister Himanta Biswa Sarma-i metetdaksü.

**GOVERNMENT OF NAGALAND
OFFICE OF THE DIRECTOR GENERAL OF POLICE
NAGALAND: KOHIMA**

NO. PHQ (B-1)1 /Recruitment/Constables/2023(PT)/(VOL-1)/1014

Dated Kohima, the 19th Jan' 2026.

ADDENDUM.

In continuation to the this Office Notice No.PHQ(B-1)1/Recruitment/Constables/2023(PT)/(VOL-1)/1002Dated Kohima, the 17th Jan' 2026, the following Roll Numbers (District Wise) which have been missed out due to clerical error is hereby shortlisted for Written Test.

1) Mon District	Sl. No.	Roll No.
	1	MONKON0073
	2	MONKON0486
2) Zunheboto District	Sl No.	Roll No.
	1	ZUNSUM1002
3) Wokha District	Sl No.	Roll No.
	1	WOKLOT2180

Sd/-

(VIDELALIE ZASHUMO) IPS

Inspector General of Police (ADM) &
Chairman, Departmental Recruitment Board,
Nagaland, Kohima.

OFFICE OF THE MOLUNGYIMSEN VILLAGE COUNCIL

(REONGSANGER PUTU)

P.O. Tuli-798618, Dist. Mokokchung : Nagaland

**NAGA NUNGER LENIR SUPONGMEREN JAMIR, MEMBER OF PARLIAMENT-I
MOLUNGYIMSEN SEMDANGBA**



Longsa Yimtisanger Yimsüsür Imsulemba Jamir, Tatatainer den Dr. Clark tembar tajung yimteta liasü, par mapang nungi yim ana kanga longjema putepa lia aru. Missionary teyari ajanga Molungyimsen nunger Mangnaangba Tzüdir 1905 küm Longsa yimdak School lapoka tesayur mapa inyak. Tamarener N.I. Jamir den Molungyimsen Medemsanger Putu-i akangtepa yaritepa lia aru, lenir Alemtemshi Jamir (Rtd) IAS Molungyimsen kanga meima yari. Tanüa sensosanger aika lenir Metsubo Jamir Minister den yaritepa amalitepa arudaki.

13/01/2026 anogo Naga Lenir Supongmeren Jamir, MP Molungyimsen semdang yimer nem temoatsü tulu agütsür sarasademr senshi. Pa aruba asoshi kanga pelar aser Tsüngrem nem tenüngsang tulu agütsür.

Tulusang Tsüngremi asen lenir taküm azükaru temoatsü pa arishi tepiyong lidakjang ta sensosanger ajaki sarasademtsür.

(T. Kora Tzüdir)
**Chairman,
Molungyimsen Village Council**

(T. Oren Longkumer)
**Secretary,
Molungyimsen Village Council**

MULUNGNEN O


ASO :
1922ASÜ :
09/01/2026

Asür Repasangba

Teti meima aliba o abala asür Repasangba (Chubayimkü), pa shiranga aliba anogo nungi akümüli wadang tembangba mapang tashi kija, kibong, lokti tentet balala, pur-medemer, kiyong-kinar aser arogotem, talisa Hon'ble MP Wb. S. Supongmeren Jamir, nenok ajaki nübu, rongsen aser sarasadem agi yaritepba asoshi ajak dang pelaba lemsateper.

~ Temeim Chimur aser Semchirtem.

MULUNGNEN O



Late Lipokmangyang (Mopungchuket)
20.12.1961 - 15.01.2026

Ozü temeim Lipokmangyang shiranga alidang aser pa iba lima nungi pilar onok mangyim jashi aser timtem nung aliba mapang shirnokisa nübo, rongsen aser sarasadem agi onok dang meima yaritepogo, nenok ajak dang onoki kanga pelaba lemsateper.

Onoki nenok ajak tenüngteta pelaba meshitetaka, Tulusang Tsüngremi nenok ajak talubosa moajangma ta onoki sarasademtsür.

- Temeim Kinungertem.

POTENTIA RESIDENTIAL

"Exclusively For NEET Aspirants"

**NEET 2026
CRASH COURSE**

**ADMISSION
OPEN**

- * LIMITED INTAKE 15 STUDENTS ONLY
- * COMPLETE REVISION - PHYSICS, CHEMISTRY & BIOLOGY
- * MOCK TESTS & EXAM-FOCUSED PRACTICE
- * EXPERT FACULTY & PERSONAL MENTORING
- * PEACEFUL RESIDENTIAL STUDY ENVIRONMENT

17th years of Consistent Neet Result

9862032828 ; 7005196036
7005657885

Khadiruzha Ward 1
Chumoukiedima

Spain nung train ana tsüktep, nisung 39 asü

Madrid, Aenjeti/January 19 (Agencies): Spain south tsütsü train ana tsüktepba nung nisung 39 asü aser aika yirua linük nung train lendong tesashiba atalokogo, ta Spain indang Civil Guard ajanga ashi.

Deobar nükongdang Adamuz nung Madrid leni aoba train ya pa jajaba lenmang alema adoka danga lenmang nungi aruya aliba train ka den tsüktep.

Train ana nungya passengers aser staff 400 mena liasü ta rail networks ajanga ashi. Emergency services-i nisung 122 anepalu aser tanur pezü densema nisung 43 tang tashi mozüki nung lir. Parnok rongnung tain 12 aser tanur ka intensive care nung lir.

Spanish Transport Minister Óscar Puente-i asürtem ya tatem masü aser ketdangsür temi bushisüngdang tenzükogo ta ashi.

Puente-i iba lendong ya kanga tesüngmangtsüka lir ta

ashi. Sorkari shisa agitepba railway experts ajunga iba lendong yagi süngmanger, ta pai Madrid nung osangbener tem dang ashi.

Rail network operator Adif-i ashiba agi, iba lendong ya nikongdang 7:45 ako (par mapang) meta atalok aser Malaga nungi north tsütsü Madrid leni ayamesor ghonda ka shi lir Cordoba yimti anasa lenmang temodong nungi pila ao.

Train ya kanga kera aruba ajanga tanabuba train ya embankment nung oa nungloktsü, ta Puente-i ashi. Asürtem aser yirurtem timba train tanabuba indang carriages tejaklen alirtem liasü, koba Madrid nungi south tsütsü Huelva leni aorba liasü ta pai ashi.

Iba lendong ajuruba train ya Freccia 1000 liasü, kobai ghonda ka nung kilometer 400 (250 mph) tashi kera jajateter, ta Italian rail company Ferrocie

dello Stato indang odongtari osangbener dang ashi.

Train mesensaba ajanga carriages telung nungi madokteti aliba nisungtem anizüktsü tasak kumdaktsür ta resuce teams temi ashi.

"Nisung takum alir kar agitetsü atema onoki nisung ka tasü mang mezü ng agizüktsüsa akum. Mapa kanga tasak lir," ta Córdoba fire chief Francisco Carmona-i ashi.

Iba lendong atalokba sülen Madrid aser Andalusia tsünga rail services ajunga anena lir aser Hombarnüa anogo tepiyong shibangtsü imlar.

Malaga nungi aoba train achayanger private rail company Iryo ajanga ashiba agi, mezü ng lenmang tezüleni aoba train nung passenger 300 shi mena liasü, aser sorkari senotsü teyari agütsüba firm Renfe-i achayangba train ka nungya passenger 100 shi mena liasü.

Karachi mi lendong nung asür 14 jungogo

Karachi, Aenjeti/January 19 (Agencies): Karachi nung hopta tatemi mall ka nung mi adokba sülen iba lendong nung asür 14 jungogo, ta Pakistan nunger ketdangsürtemi metetdaksüba den, ano nisung 50 monguteti maneni bushidar, ta shisem.

South deputy inspector general of police, Syed Asad Raza-i Dawn osang kakat dang Hombarnü ashiba agi, teküzükertemi Deobarnü nikongtsütsü ano tasü mang ti nguteta liasü aser iba ajanga asür trok aliba nungi 14 junogo.

Police surgeon Dr Summaiya Syed-i osang kakat dang ashiba agi, tasü mang pongu local mozüki ka dangi bener arua liasü.

Police aser teküzükertemi samar alir parnok 59 nungi 54 bo mobile phone data amshia bushidar aser parnok kinungertem dang osang tejangja agitsü metetdaksüogo.

Karachi ya Pakistan nung yimti tulutiba aser Sindh province indang yimtiba lir.

Sindh Governor Kamran Tessori, shibai Hombarnü lendong atalokba tesem semdanga aser pai local media dang nisung 70 dak tema samar bushidar ta ashi.

"Nisung 70 dak tem samar bushia aliba indang osang ya taoksatsüka aser lendong tulu ka lir," ta Tessori-i ashiba agi, iba lendong ya national tragedy ka kümogo ta shisem.

Mi ya Honibar aonung Gul Plaza shopping mall nung adok. Ghonda 36 sülen mibenertemi mi temseptetogo aser iba ajanga rescue team tem ki telungi iteta sabanga alirtem kümzüktsü lenmang lapoktsüogo.

Ajisüaka ketdangsürtemi ashiba agi, ki ya tamendakdak tashi meiti kümogo aser mashi mapang ka nung chireptsü akok.

Hombarnü nikongtsütsü rescue chief operating officer Abid Jalal-i Dwan osang kakat dang ashiba agi, mall shilem ka nung ano mi jangro tenzükogo anungji miben tenzükogo.

Mezü ngbo mi ya dokan ka nung electrical short circuit ka ajanga tenzük asütsü ta temulung melemi bilema liasü, saka mi tenzükba ken o mejangja aser police-i bushisüngdangdar, ta ketdangsürtemi metetdaksü.

Dokan kibur aser iba tesem nung alirtemi local media dang ashiba agi, menor telangzüba agütsüba aser tzü o hadir agi anü ngba ajanga mibenba nung tetsüdaktsü adokdaksü. Iba ajanga shishilembartem kanga mepelateper, shirnoki ashiba agi küm aika parnok soyimdak okshia rongtokogo.

Karachi nung mi lendong aiben ataloker. 2023 kuma November ita shopping mall ka nung mi adokba sülen nisung 10 asü aser 22 yirua liasü.

212 kuma süoshi yangluba factory ka nung mi adokba sülen nisung 260 asü.

Sen-i anir India nunger asayartem Indonesia Masters asayatsü



Aenjeti/January 19, 2026 (Agencies): India nunger badminton asayartem Lakshya Sen aser PV Sindhu nati anir Mongolbarnü nungi tenzuka Indonesia Masters Super 500 asayatsü.

Taküm India Open nung linük nungi asayartemi junga masayateti küm asem nung taküm tamajungtiba asayaogo. Lakshya kija quarterfinal tonga asaya saka pa champion Lin Chun Yi-i tsükdaktsü.

Indonesia Masters tebur kija asaya nung Kidambi Srikanth,

Tharun Manneapalli, Lakshya (seeded seventh), HS Prannoy aser Ayush Shetty nunger asayatsü. Srikanth mezügbuba round nung Japan nunger asayar Koki Watanabe den asayatsü, aser iba asaya kokra top seed Kunlavut Vitidsarn den asayatsü akok.

Manneapalli mezügbuba round Japan nunger asayar Yushi Tanaka den asayatsü aser Lakshya, Singapore nunger asayar Jia Heng Jason den asayatsü, shiba pai tatemsa iba ita tetenzüklen Malaysia Open nung akokba densema ponguben tashi koker lir.

Lakshya-i iba asaya kokra pa tanabuba round nung Prannoy den asayatsü akok, shiba mezügbuba round nung Lee Zii Jia den asayatsü lir. Ayush mezügbuba round nung Jonatan Christie den asayatsü.

Tetsür kija asaya nung

Unnati Hooda, Sindhu (seeded fifth), Tanvi Sharma aser Malvika Bansod nunger asayatsü. Hooda mezügbuba round Chen Yu Fei den asayatsü aser Sindhu Japan tsür Manami Suizu den asayatsü, shiba lai taoba küm India Open nung kokogo.

Tanvi fourth seed Tomoka Miyazaki den asayatsü aser Malvika sixth seed Michelle Li den asayatsü ata lir.

Tebur tarep asaya nung Hariharan Amsakarunan aser MR Arjun na qualifier tarep ka den asayatsü.

Tarep temeyoktep asaya nung Rohan Kapoor aser Ruthvika Shivani Gadde na top seeds Feng Yan Zhe aser Huang Dong Ping na den asayatsü aser Dhruv Kapila o Tanisha Crasto na France nunger tarep Julien Maio aser Lea Palermo na den asayatsü.

Pat Cummins T20 WC mezügbuba asaya masayatettsü



Aenjeti/January 19, 2026 (Agencies): Australia indang chief selector George Bailey-i, T20 World Cup masaya tsüingda Pat Cummins, Josh Hazlewood aser Tim David nunger indang osang metetdaksüogo aser ashiba Cummins asayamung nung mezügbuba asaya nungbo masayatettsü saka David bo mapang shitak nung taneptsü ngur alitsü imlar.

Cummins, shiba Pakistan den T20I asem asayatsü aliba atema meshim, pa World Cup metenzük tsüingda Sri Lanka-i maotsü. Bailey-i ashiba agi, pa Australia team February 13 nü Zimbabwe den tanabuba group-stage asaya asayaba sülenang squad nung adentsü. Paisa, Hazlewood bo iba asayamung mezügbuba asaya nung asayatettsü akok ta shiogo.

Ashes asayamung nung Cummins Test ka nung dang asayaba sülen masayai arudar. World Cup atema squad

shimtsü asoshi Australia team asoshi January 31 nü tashi mapang lir aser parnoki tang tashi iba asayamung atema reserve asayar ka danga sangdonga mali.

Bailey-isa, Tim David taoba hopta rehabilitation mapang tetsükdaktsü tilaka adoka liasü aser iba ajanga pa running session tembanga magitet, ta ashi. Ajisüaka scan asüba sülen teraksa kecha mongutet aser pa asayamung nung shilem agitettsü imla atadar.

David ya hamstring yiruba ajanga BBL nung junga masayateti liasü. Boxing Day nung Hobart Hurricanes pur atema batting amenba mapang pa yiru. Kasa mapang nung Hazlewood tetsüing tachichilen New South Wales nungi asayadang hamstring yiruba sülen pa November ita nungi khen danga masayai arudar.

Maneni Bailey-i, senior asayar kar masayatettsüsa kümra Smith team nung anioktsü asoshi asadangsü ta shiogo.

AO 2026: Djokovic, Swiatek, Gauff nungeri takok angu

Aenjeti/January 19, 2026 (Agencies): Grand Slam 25buba akoktsü arishiba mapang Djokovic-i Hombarnü tang asaya aliba Australian Open nung mezügbuba round nung Spain nunger asayar Pedro Martinez 6-3, 6-2, 6-2 agi kokogo.

Iba asaya akokba ya Djokovic asoshi Australian Open nung asaya 100buba akokba liasü.

Djokovic tang world rankings nung pezügbuba nung lir aser pa January ita warm-up asayamungtem nung masayaba sülen pa fitness dak sendakba nung ken o balala ashishia aruogo, saka pai telangzüba tapet agüja iba asaya kokogo.

Pa tatemsa asayamung ka nung November ita tetenzüklen asaya liasü, saka pa asayaba yimya mejungi akümba mesüra

mevilongi akümba kecha merprangtet.

Pa taruba round Italy nunger qualifier Francesco Maestrelli den asayatsü.

Kasa asayamung tetsür kija asaya nung Iga Swiatek aser Coco Gauff napronglai pei tata asaya koka tanabuba round tongtetogo.

Grand Slam trok koker alila Swiatek-i mezügbuba round nung China tsür qualifier Yuan Yue 7-6 (7/5), 6-3 agi koka liasü.

Polish tsür la yagi Melbourne nung iba asayamung kokra lai Grand Slam pezüprongla akoktsü.

Tetsür asaya tanga ka nung Gauff-i straight-sets agi Kamilla Rakhimova 6-2, 6-3 agi koka liasü. Lai asaya ayong ayonga akok ama reprangteter, saka asaya tetenzüklen talisa service aoba mapang tetsükdaktsü

ajangshia liasü.

La tanabuba round nung Olga Danilovic den asayatsü shiba Venus Williams tsükdakja liasü.

Fourth seed Amanda Anisimova, shiba Grand Slam final asembuba atonga asayatsü merangdar, lai 6-3, 6-2 agi Simona Waltert ayong ayonga kokogo.

Jessica Pegula aser Mirra Andreeva natia pei tata asaya kokogo, ajisüaka Sofia Kenin aser Alexandra Eala nabo tsükogo.

Tebur kija asaya nung Daniil Medvedev-i maneni kanga junga asaya 7-5, 6-2, 7-6 (7/2) agi Jesper de Jong kokogo.

Australia nunger asayar Alex de Minaur-a tanabuba round-i iogo, saka Felix Auger-Aliassime bo tetsüing nung timtem adokba sülen asaya tembanga masayateti tsükogo.

ICC-i mapa atakzüksüba ajanga Bangladesh jenjang mejungi kümogo

Aenjeti/January 19, 2026 (Agencies): Osang ajanga ashiba agi, Bangladesh team World Cup asayatsü atema India-i arutsü marutsü iba indang osang agütsütsü atema ICC-i Bangladesh Cricket Board (BCB) nem January 21 nü tashi mapang agütsüba sülen Bangladesh team taruba T20 World Cup nung asayatsü masayatsü mejangja kümogo.

Osang ajanga ashiba agi, ICC-i Bangladesh dang India nung asayatsü atema mulunga agizükang, ajita mesüra asayamung nung masayadaksütsü ta shiogo. Security dak sendakba nung tebilemtsü lir ta shia BCB-i India nung asayatsü memulunger aser ICC dang Bangladesh indang asayatem co-host Sri Lanka-i belener

aotsü mepeshia asüingdangogo. Hopta tatem BCB aser ICC ketdangsürtem Dhaka nung sensaksemogo, saka tangatettep ka dangi maruteti tembangogo.

Sensaksem mapang BCB-i parnok asayatem belener aotsü atema ICC dang maneni mepeshia metetdaksüogo, ta BCB sangdong ka ajanga metetdaksü.

Iba dak sendakba nung ICC-i official telangzüba ka magütsü, ajisüaka media osang balala ajanga ashiba agi, telemtetba ka agütsü atema Bangladesh nem Bodhbarnü tashi mapa atakzüksüogo.

Nüngdak dang süra Scotland-i Bangladesh melentsü akok, kechiyong parnok qualify masüba team tem rongnung rank timba nung aliba team lir.

T20 World Cup ya February 7 nü nungi tenzuka asayatsü. Bangladesh team Group C nung ata lir aser parnok asaya Kolkata aser Mumbai nung asayatsü lir.

Sensaksem nung Ireland den group melentsü atema benokdangogo, shirnok Group B nung lir aser Sri Lanka nung asayatsü lir.

January 3 nü BCCI tetuyuba nung Kolkata Knight Riders (KKR) pur Bangladesh nunger fast bowler Mustafizur Rahman IPL squad nungi chiokba sülen mepetmesü tenzuka liasü.

Tanga yanglua aliba fixture nung Bangladesh team Kolkata nung asaya asem asayatsü aser iba sülen group stage nung tatembangbuba asaya Mumbai nung asayatsü.

INDIA OSANG : Tapak 3 nungi...

2027 küm AAP-i Gujarat nung BJP sorkar...

Kejriwal-i, "Tamalen Nikol nung senden agitsü atema temelaba meshiba magizük, aser parnoki senden nokdangtsü kanga merangyonga tanü iba senden agiteter. Iba ya party nung inyakertem temelungtetba ajanga lir," ta ashi.

Tawa AAP MLA Gopal Italia dak tsüingsem onloktsüba tatalokba dak sendakba nung Kejriwal-i, "Anogo ana tejaklen parnoki Gopal Italia dak tsüingsem onloktsü. Pa dak tsüingsem onloktsüsangi video ka ajanga, BJP lenir kati pa nem sen 50,000 den yi agütsü ta shiogo," ta metetdaksü.

Kejriwal-isa, tang AAP lenirtem aika jail nung lir aser ibaji party-i aluyimertem

timtem aser 'karda' system atema ola adokba agi lir, ta ashi.

Taoba mpang Delhi Chief Minister Kejriwal-isa, "Tang Gujarat nung aluyimertem, shishilembartem, lanurtem aser tetsürtem kanga timtema alir. Parnoki sorkar school tem aser sorkar hospital tem raksatsüogo. Tangbo shishilembartem aikati yimjak nung tejashi lemsateper aser sorkar melentsü atema ola adoker," ta metetdaksü.

Kejriwal-isa, Gujarat nung AAP sorkari karda system anentsütsü, mapang shidak nung aluyimertem nem metsüh, fertilisers aser tzü agütsütsü, lanurtem atema mapa adokdaksütsü aser yi tamajung den temesepba mozü nokdangtsü, ta ashi.

BILEMDANGANG

"Nü taküm ya tangar asoshi kaket ka lir."